

TEZAU LITURGIC

31 OCTOMBRIE

**ACATISTUL
SF. 100.000
MUCENICI
DE LA TBILISI**



TBILISI, 2000



დაუჯდომელი საგალობელი წმიდათა ათთა-ბევრთა მოწამეთა, ხუარაზმელთაგან ტფილისსა შინა ხატთა თაყუანისცემისთვის წამებულთა

კონდაკი 1

ჭეშმარიტებისა მოწამეთა და მართლმადიდებლობისა ქადაგთა, ვარსკულავთა ეკლესიისათა მრავალ-ბევრთა შეგასხამთ მორწმუნენი ქებითა საღმრთოთა და ვედრებასა ამას შევსწირავთ თქუენდა, გალობანი ჩუენნი მიითუალეთ, მარტჯლნო, და ნუ მოგვაკლებთ შეწევნასა თქუენსა, არამედ ნათლითა ბრწყინვალებათა თქუენთათა განგუანათლეთ და წყუდიადი უმეცრებისაჲ განსდევნეთ მგალობელთაგან თქუენთა: გიხაროდენ, ათნო ბევრნო მოწამენო, დიდებანო და გვრგვ-ნნო ტფილის-ქალაქისანო!

იკოსი 1

კუალად შეიმოსა ეკლესიამან სამკაული სიხარულისაჲ და ბრწყინვალებითა სისხლთა თქუენთათა დაიდგა გვრგვნი მუენიერებისაჲ და დიდებისაჲ სიმჴნითა თქუენითა, რამეთუ დაჭრიდენ რაჲ ჯორცთა თქუენთა, სისხლი თქუენნი უბრალოდ შეიწირვოდეს წინაშე

ღმრთისა, ვითარცა იგი სისხლი აბელ მართლისა, რომლისათვისცა მარადის აღმოაცენებს კურნებასა ადგილი წამებისა თქუენისაჲ და ყოველთა ალგვძრავს შეწირვად გალობისა და ქებისა:

გიხაროდენ, ძმანო და დანო საკვრველნო, ქრისტეს საკვრველთა ერთ-ზრახვად შეკრულნო;

გიხაროდენ, უსასყიდლო მსხუერპლად ღმრთისა მიმართ შეწირულნო;

გიხაროდენ, ერთითა წმიდითა განზრახვითა შეერთებულნო;

გიხაროდენ, კეთილსახიერებისა ტრფიალებითა შემტკიცებულნო;

გიხაროდენ, ღმრთისა ძალითა კეთილად აღჭურვილნო;

გიხაროდენ, სპარსთა მიერ უწყალოდ აღსრულებულნო;

გიხაროდენ, ტკივილითა მოღუაწებრითა განშუენებულნო;

გიხაროდენ, მწყობრსა შინა მარტვლთაჲთა განბრწყინვებულნო;

გიხაროდენ, სანუგეშოდ ეკლესიისა და განსაბრწყინვებლად ივერიისა გამოჩინებულნო;

გიხაროდენ, ბრძმედსა შინა მძაფრთა საღმობათასა გამოჯურვებულნო;

გიხაროდენ, ვარდნო მეწამულნო, ღმრთივ-

დანერგულნო;

გიხაროდენ, სისხლთა ნაკადულითა ურთიერთას
აღრეულნო;

გიხაროდენ, ათნო ბევრნო მოწამენო, დიდებანო და
გვრგვზნო ტფილის-ქალაქისანო!

კონდაკი 2

რაჟამს ჯალაღედინ სულტანი ხუარასნისაჲ და მეფე
ყოვლისა სპარსეთისაჲ, მღტოლვარე იქმნა
მონღოლთაგან, უწყოდა რაჲ სიმაგრე ქუეყანისა
ჩუენისაჲ და სიმენს ქართველთა ნათესავისაჲ,
განიზრახა ქმარ-ყოფად რუსუდანისა და მეფე-ყოფად
თავისა თვისისა, გარნა აუწყეს რაჲ რუსუდანს თქმული,
მიუმცნო, არცა თუ სმენად საქმისა ამისა, მაშინ
განძნდა სულტანი, ვითარცა ლომი მძვნვარეჲ, და
გარემოადგა ტფილისსა, რომლისაცა მცველნი
განმცნობილნი ბრძოლად ჳმოზდენ ძლევისა გალობასა:
ალილუია.

იკოსი 2

მაშინ აღიჭურნეს მცველნი ქალაქისანი და იქმნა
ბრძოლაჲ ძლიერი, და ბრწყინვალეჲ ძლევად აჩუენეს
ქართველთა, გარნა მას ღამესა იდუმალ განახუნეს
კარნი ქალაქისანი უკეთურთა მათ შინა-განმცემელთა,
სპარსთა ტფილელთა და შევიდეს რაჲ ხუარაზმელნი

შინაგან ქალაქსა, საშინელითა აღსპობითა
განურჩევლად მოსწყუედდეს ყოველთა, ხოლო თქუენ,
მკვდრნო ტფილისისანო, არა შეირყიენით, არამედ
განემზადენით ღუაწლად, რომლისათჳს ღირს
გვყუენით მადლთა თქუენტა საღმრთოთა გალობად:

გიხაროდენ, სამკვდრებელნო სულისა წმიდისანო;
გიხაროდენ, მნათობნო ქუეყანისა და
სარწმუნოებისანო;

გიხაროდენ, საღმრთონო სუეტნო
მართლმადიდებლობისანო;

გიხაროდენ, მთიებნო ბრწყინვალენო მზისა
სიმართლისანო;

გიხაროდენ, ჭემმარიტნო ქადაგნო
კეთილმსახურებისანო;

გიხაროდენ, მახზლნო, განმკუეთელნო
ბოროტმსახურებისანო;

გიხაროდენ, ძეგლნო სიმჯნისა და ახოვნებისანო;

გიხაროდენ, უძლეველნო ბანაკნო ზეცისა მეუფისანო;

გიხაროდენ, უწყალოდ მოსხლულნო ვაზნო ქრისტეს
ვენახისანო;

გიხაროდენ, დაუჭნობელნო ყუავილნო საცნაურისა
სამოთხისანო;

გიხაროდენ, წარუტყუეველნო ბჭენო ივერთა
ქუეყანისანო;

გიხაროდენ, გოდოლნო, ძალნო და სიმტკიცენო

ეკლესიისათვის;

გიხაროდენ, ათნო ბევრნო მოწამენო, დიდებანო და გზრგზნო ტფილის-ქალაქისათვის!

კონდაკი 3

არა იკმარა უკეთურმან სიონისა გუმბადისა დარღუევად და მას ზედა ბილწისა ტახტისა აღშენებად, და ბრძანა უფლისა ჩუენისა იესუ ქრისტესა და ყოვლად წმიდისა ქალწულისა მარიამისა ხატთა სიონითგან მოყუანებად, საშუალ მეტეხისა ხიდისასა პირაღმართ დადებად, და ყოველთა პერობილთა ქრისტეანეთა მიერ პატიოსანთა ხატთა დათრგუნვად, ხოლო უკუეთუ არა პეონ ესე, თავთა წარკუეთად, გარნა თქუენ სჯულისდებასა ცრუდსა მის მუჰამედისასა არა შეიწყნარებდით და კიდესა მას ხიდისასა მდგომარენი, ჳელ-განპერობით ქრისტესა ადიდებდით: ალილუია.

იკოსი 3

მაშინ ბრძანებულისაებრ პევეს ყოველი მტარვალთა და მოპეგანდეს მამანი დედათა თანა და აიძულებდეს ესრეთ ყოფად, გარნა უმრავლესთა ქრისტესთჳს პერობილთა საკვრველი სიმჳნჳ აჩუენეთ და შეურაცხებად წმიდათა ხატთად, და მჯულისა დატევებად არა თავს-იდეთ, არამედ კადნიერებითა და ახოვნებით აღიარეთ ქრისტე ღმერთი და

თავისუფლებისა და პატივისა წილ გვრგვნი
მარტვლობისაჲ მიიღეთ, რომლისათვისცა ვიქადით
მორწმუნენი და ერთ-ვმოებით გილაღადებთ:

გიხაროდენ, სარწმუნოებისა უბიწოდ დამმარხველნო;
გიხაროდენ, საღმრთოთა მცნებათა გულსა შინა
თქუენსა დამდებელნო;

გიხაროდენ, გულისა ამპარტავნებისა
დამთრგუნველნო;

გიხაროდენ, უსამართლოთა ბჭობათა დამარღვეველნო;
გიხაროდენ, ახოვნებითა გონებისაჲთა გუემათა
დამთმენელნო;

გიხაროდენ, სასოებითა ღმრთისაჲთა მტერისა
აღლესულისა მახვლისა დამლეწველნო;

გიხაროდენ, ჭირთა და ურვათა საჯუმილისა
დამშრეტელნო;

გიხაროდენ, თქუენდა მომართ მოღტოღვლთა გზასა
ზედა მცნებათა უფლისათა დამაყენებელნო;

გიხაროდენ, სივერაგეთა კაცობრივთა და ზაკუვათა
მტერისაჲთა დამკსნელნო;

გიხაროდენ, სანთელნო, გონიერთა განმანათლებელნო
და უგუნურთა დამწველნო;

გიხაროდენ, დაკსნილთა კეთილზნეობითა
აღმძვრელნო;

გიხაროდენ, სულთა არა წმიდათა განმდევნელნო;

გიხაროდენ, ათნო ბევრნო მოწამენო, დიდებანო და გვრგვინო ტფილის-ქალაქისანო!

კონდაკი 4

მას ჟამსა შინა წარჩინებულნი ერისანი, ვითარცა შუენოდა მპყრობელსა მაშინდელსა, რომლისა ცოდვითა დაისაჯა ღმრთისაგან სამეფოდ მისი, აფროდიტისა და დიონისის* საეშმაკო-და ბომონისა იყუნეს თაყუანისმცემელნი და საქმითა ბილწებისადათა განარისხეს შემოქმედი თვისი, ეგრეთვე აწ ჩუენზედა არს მოწევნული ესე ძვირი, მცირედლა და ერსა ჩუენსა ზედა კუალად მოიწევის განსაცდელი, რომლისათვის, მოწამენო, მკურგალედ გევედრებით, ქრისტჳს მიმართ მეოხ-გუეყვენით, რადათა განგვმრავლოს რჩეულნი და ბრძენნი წინამძღუარნი, და მოგუცეს მეფჳ ღმრთისა მიმართ დავითისაებრ სიმდაბლითა მგალობელი: ალილუია.

იკოსი 4

წინა-მდებარეთა საშინელთა სატანჯუელთა რადა ხედევდით, ჩინებულნი ეგე რჩეულნი უშიშითა გონებითა მიუგებდით: „ნუ სდროებთ აღსრულებად ბრძანებულსა თქუენდა, რამეთუ არა შეურაცხ-ვჳყოფთ ჩუენ ხატსა უფლისა ჩუენისა იესუ ქრისტჳსსა და უხრწნელისა დედისა მისისასა, არამედ ძრწოლით

თაყუანის-გვსცემთ, რომელსა ჰშუენის თაყუანის-ცემაა და პატივი“, და სიხარულითა წარუპყრენით მახვლსა ქედნი თვსნი, ამისთვისცა მართლმადიდებელისა ეკლესიისა შვლნი განკვრევითა ჳმა-გვპყოფთ და ვიტყვთ:

გიხაროდენ, ანგელოზთა წესთა მობაძავენო;

გიხაროდენ, საჭურველითა სიტყუათა თქუენთაათა მტანჯველთა მომწყულელნო;

გიხაროდენ, ბელიარის ზრახვათა მომსრველნო;

გიხაროდენ, ძლევისა გვრგვნისა მომგებელნო;

გიხაროდენ, ვნებათა სიმწარისა და გემოდსა მომაძაგებელნო;

გიხაროდენ, სიყუარულისაგან შუებათა წუთიერისა და მსწრაფლ-წარმავალისა მომაქცეველნო;

გიხაროდენ, კეთილნო შუა-მდგომელნო და მზაკურებათა განმდევნელნო;

გიხაროდენ, წარწყმედელისა უღებებისაგან გამომვსნელნო;

გიხაროდენ, მტერისაგან მოწყულთა განმკურვნელნო;

გიხაროდენ, სარწმუნოებითა მტკიცითა ცრუ-შჯულისდებისა საცთურისა განმაქარვებელნო;

გიხაროდენ, მორწმუნეთა სულთა საცნაურად განმანათლებელნო;

გიხაროდენ, ცოდვილთათვს ღმრთისაგან წყალობისა

გამომთხოველნო;
გიხაროდენ, ათნო ბევრნო მოწამენო, დიდებანო და
გზრგზნო ტფილის-ქალაქისანო!

კონდაკი 5

ჟ, სანატრელი ყოფად თქუენი გონიერი, რამეთუ
შინებასა და ლიქნასა მძლავრთასა არა უარჰყავით
თქუენ ქრისტე, შემოქმედი ჩუენი და უფალი, არამედ
მოყუასი მოყუასსა განამლიერებდით მეტყუელნი:
„დავითმინოთ ერთ-გზის საშინელი სიკუდილი და
მოვილოთ მაცხოვრისა ჩუენისა იესუ ქრისტჱსთანა
უკუდავებად დაუსრულებელი“, და განამლიერებელსა
თქუენსა ჳმა-ტკბილად ადიდებდით: ალილოუია.

იკოსი 5

თანა-მოწამე იქმენით და თანა-ზიარნი ურთიერთარს
და ერთობით მიხუედით ასპარეზსა ვნებისასა, არა
ყოველნი მამაკაც, არამედ რომელნიმე დედაკაც, გარნა
ერთ ქრისტე იესუდს მიერ, რამეთუ ქრისტჱს მიერ
ნათელღებულთა და ქრისტე შემოსილთა შორის არა
არს რჩევად მამა-კაცისად და არცა დედა-კაცისად,
რომლისათჳსცა აწ ენასა ჩუენსა, უძლოურად
მეტყუელსა, მოეციოთ ძალი შემკობად ღუაწლისა
თქუენისად:

გიხაროდენ, ნაკადულნო მრავალ-ბევრნო, ერთისა
დაბეჭდულისა წყაროდსანო;

გიხაროდენ, ურჩეულესნო ჭურნო სიწმიდისანო;

გიხაროდენ, ყოვლადბრწყინვალენო წინამბრძოლნო
ჭეშმარიტებისანო;

გიხაროდენ, დამტევნელნო საღმრთოდსა
ბრწყინვალეებისანო;

გიხაროდენ, გონიერნო ანდამატნო მოთმინებისანო;

გიხაროდენ, ყოვლად შეუძრველნო სუეტნო
სიმჴნისანო;

გიხაროდენ, ტკბილად მზიდველნო საღმრთოდსა
ულლისანო;

გიხაროდენ, ურწმუნოთა მტერთა მძლეველნო
უშიშარნო მკედარნო ქრისტეს ღმრთისანო;

გიხაროდენ, მტვრთველნო ერთისა მის მძვნვარისა
განსაცდელისანო;

გიხაროდენ, სარწმუნოებითა მტკიცითა
განმაქიქებელნო მძლავრთა უღმრთოებისანო;

გიხაროდენ, შემწენო და მფარველნო ქართველთა
მკედრობისანო;

გიხაროდენ, დიდებულნო სამკაულნო ზეციერისა და
ქუეყნიერისა ეკლესიისანო;

გიხაროდენ, ათნო ბევრნო მოწამენო, დიდებანო და
გვრგვზნო ტფილის-ქალაქისანო!

კონდაკი 6

მაშინ უშურველად მაღლი ღმრთისაჲ განეფინა ბაგეთა თქუენტა და შიშისაგან ძლეულთა ესრეთ განამკნობდით: „ჟ საწყალობელნო და უბადრუკნო თანა-მოქალაქენო, ნებსით განმცემელნი თავთანი ნუ დააკლებთ თავთა თჳსთა გზრგზნისა მისგან, რომელიცა ესერა წინა-გვიძს მოღებად“, და დაუდუმებელითა ფსალმუნებითა და ლოცვითა არა დასცხრებოდით დიდებისმეტყუელებად ღმრთისა: ალილუია.

იკოსი 6

არა ერთისა წესისა ქუეშე პყრობითა შეცულ იყვენით, ღუაწლისა-მძლენო, არამედ რომელნიმე თქუენგანნი ეპისკოპოს, რომელნიმე მღდელ, რომელნიმე დიაკონ და მსახურ ეკლესიისა, რო-მელნიმე მონაზონ და მოწესე, და რომელნიმე მსაჯულ და განმსჯელ ერისა, რომელნიმე მკედართა შორის უპირატეს და რომელნიმე მკედარ, გარნა ყოველნი შემწირველნი თავთა თჳსთა საკურთხეველსა ზედა ვნებისასა, ქრისტჳს ღმრთისა მიმართ, რომლისათჳსცა კრძალვით შეუვრდებით პატიოსანსა ხატსა თქუენსა და მოგართუმევთ ჳმასა საღმრთოჲსა ქებისასა:

გიხაროდენ, სულისა აზნაურებისა დამმარხველნო;
გიხარდენ, სასოებისა თქუენისა ღმრთისა მიმართ

დამდებელნო;

გიხაროდენ, ქრისტეს ჯუარისა ამღებელნო და
სარკინოზთა ძირს დამკვეთელნო;

გიხაროდენ, ზუარაკნო წმიდანო და უბიწონო,
ქრისტწსთვს სისხლისა დამთხვეელნო;

გიხაროდენ, ღმრთისა, მამულისა და მოყუასის
შეუორგულეებელისა სიყუარულისა დამნერგველნო;

გიხაროდენ, სიბრძნითა სულისაძთა მძაფრთა
სატანჯველთა ახოვნად დამთმენელნო;

გიხაროდენ, მეცდომილთა ჭემმარიტებისა გზასა ზედა
დამაყენებელნო;

გიხაროდენ, უცხო თესლთა საცთურისა კადნიერად
დამამკობელნო;

გიხაროდენ, გულის-სიტყუათა ბოროტთა
დამთრგუნველნო;

გიხაროდენ, სარწმუნოებითა აღმსთობილთა და
კეთილმავალთა სიბრძნითა დამცველნო;

გიხაროდენ, ცოდვათა ჩუენტა საკრველთაგან
დამკსნელნო;

გიხაროდენ, გულითა დაზრქელებულთა სიყუარულად
აღმძრველნო;

გიხაროდენ, ათნო ბევრნო მოწამენო, დიდებანო და
გვრგვნო ტფილის-ქალაქისანო!

კონდაკი 7

ქრისტწსთჳს პყრობილთა მათგან არცა ერთისა ჰასაკისანი იყვენით, ახოვანხო, არამედ რომელნიმე ყრმაჲ, რომელნიმე ჭაბუკ, რომელნიმე მჴცოვან, რომელნიმე ბერ, და რომელნიმე უხუცეს, გარნა ყოველნი მიიწიენით ერთობითა სარწმუნოებისაჲთა სრულად საზომად ჰასაკისა სრულებასა მის ქრისტწსისა, რომლისათჳსცა გიგალობთ ერთობასა შვერთებულსა სულისა მიერ წმიდისა და დიდებასა და ქებასა აღვაგლენთ წინაშე მეუფისა და ღმრთისა: ალილუია.

იკოსი 7

სანატრელ ხართ თქუენ, ღმერთშემოსილხო, რომელნიმე მთავართაგან ჩინებულთა, რომელნიმე აზნაურთაგან, რომელნიმე ვაჭართაგან და რომელნიმე გლაზაკთა, გარნა ყოველნი შობილ სულითა ღმრთისაგან, რომლითა სძლიეთ სოფელსა და ბაძვითა პირველ ვნებულთა თქუენტა მოწამეთაჲთა, ისწრაფდით ქორწილსა მას სიძისა შუენიერისა და უკუდავისასა, რომლისათჳსცა გიგალობთ თქუენ, მოწამენო, ჩუენ ცოდვილთაგან დიდად სანატრელხო, და მოგიძლუნით სადიდებელსა ამას ძლევისასა:

გიხაროდენ, სიმდაბლითა გულისადათა ღმრთისა
სახიერებისა მადიდებელნო;
გიხაროდენ, ჯუარისა ძლიერებისა შემოსველნო;
გიხაროდენ, აღბორგებულთა ღმრთისმოძულეთა
მძლეველნო;
გიხაროდენ, ყოველთა უკეთურთა და უღებთა
მარცხვენელნო;
გიხაროდენ, სარწმუნოებით მგალობელთა
მაკურთხეველნო;
გიხაროდენ, მხოლოო მართლმადიდებელთა
ლაშქართა და სპათა დიდად მწყალობელნო;
გიხაროდენ, ყოველთა მჭურვალედ მვედრებელთა
თქუენტა მაცხოვნებელნო;
გიხაროდენ, მედროვეთა და მზაკუვართა,
უარისმყოფელთა წინაპართა ჩუენტა ღუაწლისა
ძლევეით მამხილებელნო;
გიხაროდენ, უსასყიდლოდსა მარგარიტისა
მომვაჭრებელნო;
გიხაროდენ, ქრისტეს ნებისყოფელთა შემწენო და
შესავედრებელნო;
გიხაროდენ, უკეთურთა სულთა მძლენო და
შემმუსრველნო;
გიხაროდენ, მწუხარებათა ჩუენტა სიხარულითა
შემცვალებელნო;

გიხაროდენ, ათნო ბევრნო მოწამენო, დიდებანო და გვრგვინო ტფილის-ქალაქისანო!

კონდაკი 8

მხილველი მძლავრი უშიშოებისა თქუენისაჲ და მსმენელი ლოცვისა თქუენისაჲ, სიმტკიცემან თქუენმან აღაბორგა და მტარვალნი განმაშიშვლებელნი მახვლთანო მძვნვარედ დაჭრად და აღსპო-ბად თქუენდა დაადგინა, გარნა თქუენ, მწნენო, არად შერაცხეთ განრისხებაჲ უშჯულოთაჲ და არცა ყოვლად ზარ-განხდილ იქმენით, არამედ ვნებას მისრულნი სამებასა წმიდასა გალობითა მრავალწმოვანითა ადიდებდით: ალილუია.

იკოსი 8

დალათუ იყვენით თქუენ მართლისა სარწმუნოებისა აღმსაარებელნი, გარნა არა ყოველნი ქართველნი, არამედ რომელნიმე უცხონი, უცხოთა შჯულითა მოსრულნი და ქრისტჳს, ჭემმარიტისა ღმერთისა შემმეცნებელნი, და სანატრელთა მათ მოწამეთა: შუმანიკისა, რაჟდენისა და ჰაბოდსა მიბაძვითა, მისთვის თავისა შემწირველნი, რომლისათვისცა ერნი საქართველოდსანი ტაძრად თქუენდა მოვისწრაფვით და გაქებთ შემოკრებულნი ყოველნი:

გიხაროდენ, დაუცადებელითა ლოცვითა ეშმაკისა
ცთუნებათა განმდევნელნო;

გიხაროდენ, უღმრთოებისა და ბნელისა მოძღურებისა
სიტყუათა თქუენთა შურდულითა განმთხვეველნო;

გიხაროდენ, უშჯულოთა მიერ ზარგანხდილთა
ქრისტეანეთა სულიერად განმამტკიცებელნო;

გიხაროდენ, ღუაწლითა თქუენითა ეკლესიისა
განმაბრწყინვებელნო;

გიხაროდენ, მტერთა ზახებისა განმაბნეველნო;

გიხაროდენ, მრავალშეთხზულთა მათ მანქანებათა
მტერისათა განმაქარვებელნო;

გიხაროდენ, მოსავთა თქუენთა განმანათლებელნო;

გიხაროდენ, არა-ცხოველისა და ნელტფილისა
სარწმუნოებისა ჩუენისა განმაცხოველებელნო;

გიხაროდენ, ამბოხისა და ბრძოლისაგან
განმარინებელნო;

გიხაროდენ, ცუარითა მით საღმრთოდთა მორწმუნეთა
განმაგრილებელნო;

გიხაროდენ, შეგინებულისა გონებისა ჩუენისა
აღმადგინებელნო;

გიხაროდენ, ღუაწლითა თქუენითა წარუალისა
ნათლისა მომღებელნო;

გიხაროდენ, ათნო ბევრნო მოწამენო, დიდებანო და
გვრგვზნო ტფილის-ქალაქისანო!

კონდაკი 9

ჟ, ერთ-გონიერებად ძმათად, ჟ, სიყუარული მოყუასთად,
 ჟ, მამაკაცთა და დედაკაცთა ურთიერთარს
 შეთქმულებად, რამეთუ ჳმანი ესე მოყუასთაგან
 მოყუასთა მიმართ ყოველთა განსწუთებოდა და
 მსმენელი ამისი ათ-ბევრობად იგი ბრწყინვალითა
 ჳმითა ჳმოზდა: „უფალო, იესუ ქრისტე, ძეო და
 სიტყუაო ღმრთისაო, შეგჳწყალენ ჩუენ და წარმართე
 სრბად ესე ჩუენი, და მიითუალენ სულნი ჳელთა შინა
 შენთა“, და ვითარცა ყრმანი ძუელად საჯუმილსა შინა,
 მადლობით აკურთხევდენ ყოვლისმჳყრობელსა
 ღმერთსა: ალილუია.

იკოსი 9

მაშინ უგუნურნი ქრისტეს მზრძოლნი, ურიდად
 შეგერინეს, ვითარცა კრავთა, და ერთი ერთსა
 უსწრობდეს, რომელნიმე მახზლითა გცემდეს,
 რომელნიმე ჳოროლითა და ისრითა შეგჩხუპდეს და
 ჳორცთა თქუენთა უწყალოდა დასჭრიდეს, და
 რომელნიმე დანებითა განგაპებდეს და გვამსა თქუენსა
 ქუეშე ხიდისასა, მტკუარსა შინა ჩაჳყრიდეს, და რაჳამს
 სრულ-იქმნა წამებად თქუენნი, გზრგზნსა დაუქნობელსა
 მიემთხვიეთ, და აწ ცოდვათა მოტევებად და კეთილი
 ცხორებად ითხოვეთ ჩუენთჳს, რადთა სიხარულითა
 გულისადათა გნატრიდეთ:

გიხაროდენ, ახოვნებითა მტერთა მძლეველნო;
გიხაროდენ, უმოწყალოდასა სიკუდილისა მადლობითა
მიმღებელნო;
გიხაროდენ, სისხლითა თქუენითა მართლისა
სარწმუნოებისა განმადიდებელნო;
გიხაროდენ, წამებისა თქუენისა ნათლითა მამულისა
წყუდიადისა განმაცისკრებელნო;
გიხაროდენ, ერისა ჩუენისასულიერად
განმაბრწყინვებელნო;
გიხაროდენ, ტფილისის სანახებთა ღუაწლითა
თქუენითა განმაშუენებელნო;
გიხაროდენ, მადლითა საღმრთოთა უმეცართა
განმაბრძნობელნო;
გიხაროდენ, სნეულებათა და წყლულებათა
განმამრთელებელნო;
გიხაროდენ, ჰრულითა მცონარებისადათა
შეპყრობილთა განმამცნობელნო;
გიხაროდენ, უღმერთოებითა და უმჯულოებითა
დაბრმობილთა გულისცმისყოფელნო;
გიხაროდენ, საღმრთოდასა სარბიელისა კეთილად
სრულყოფელნო;
გიხაროდენ, პატივისმცემელთა თქუენთა მსწრაფლ-
შუამდგომელნო;
გიხაროდენ, ათნო ბევრნო მოწამენო, დიდებანო და
გვრგვზნო ტფილის-ქალაქისანო!

კონდაკი 10

ჟ, გულისწმისყოფად უბიწოდ, რომელი პირველ მწყობრთა შორის გამობრწყინდა და ვიდრე უკანადსკნელადმდე განგრძელდა, რომელთამე ისნისა, კალაძსა და ტფილისისა მკვდრთა და რომელთამე ჟამსა განსაცდელისასა გარემო სოფელთაგან, ვითარცა უმტკიცესსა ციხესა შემოვედრებულთა, რომლისათჳსცა მოგიჴსენებთ მკვდრად დედაქალაქისა, სადაცა საბანელმან მეორედ შობისამან აღმოგშუნათ სიმრავლჳ ბევრთაჲ, და სამადლობელსა გალობასა შევსწირავთ ღმერთსა: ალილუია.

იკოსი 10

რაჟამს იქმნა წყალი იგი მდინარისაჲ წმიდათა გუამთა თქუენტა მიერ აღმოვსებულ და პორფირად ღებულ, ხოლო სიღრმჳ იგი წყალთაჲ საფლავ თქუენდა, მაშინ ღამესა მას უნათლეს მზისა გაბრწყინდა გარემოდ კიდეთა მის მდინარისაჲთა დაუვსებელისა ნათლისა მიფენითა, რომელსაცა ყოველი ხედვიდა, ამისთჳსცა დიდებულსა ჴსენებასა თქუენსა სამეუფოდ ქალაქი ჩუენი უნივთოდთა სიხარულითა შეიმკუების და კურთხეულითა ენითა ქართულითა ღაღად-ჴყოფს წადიერად:

გიხაროდენ, სულისა თქუენისა უშფოთველად
ღმრთისადმი გარდამცემელნო;
გიხაროდენ, სისხლთა თქუენტა დათხევითა ხიდისა
მის და ალაგთა მეტეხისთა წმიდა სავანედ
გარდამქცეველნო;
გიხაროდენ, დიდისა მის მდინარისა მტკუარისა
განმწმედელნო;
გიხაროდენ, სენტა მრავალფერთა და უძლურებისა
განმდევენელნო;
გიხაროდენ, დაბნელებულისა გონებისა ჩუენისა
განმაცისკრებელნო;
გიხაროდენ, განრღვეულისა მამულისა სულისა
განმაცხოველებელნო;
გიხაროდენ, ვნებათა აღმურისა და ბოროტთა
სნეულებათა განმაქარვებელნო;
გიხაროდენ, ნაყოფითა სიმწნეთა თქუენტათა
მორწმუნეთა განმამწნობელნო;
გიხაროდენ, მაღლითა საღმრთოთა უმეცართა
განმაბრძნობელნო;
გიხაროდენ, ვნებათა სიმრავლისა, ვითარცა
ღუარძლისა აღმომფხურელნო;
გიხაროდენ, ნათესავსაცა ამას ქართველთასა
აღმატებულთა სიხარულითა ამამალლებელნო;
გიხაროდენ, გონებათა ჩუენტა ზეცად აღმყუანებელნო;

გიხაროდენ, ათნო ბევრნო მოწამენო, დიდებანო და გვრგვინო ტფილის-ქალაქისანო!

კონდაკი 11

ოდეს თავნი თქუენნი წარკვეთილნი ხიდსა მას ზედა ჰგორვიდიან, მახლობლად მისა, სადა იგი დაწვეს ჯორცნი იგი წმიდისა მოწამისა ჰაბოდსნი, მიერთგან ურიცხუთა ჭირთა ტფილისელთასა მრავალ-გზის დამკსნელ იქმენით, რომლისათჳს გევედრებით, მოწამენო, დაიცე-ვით ქალაქი ჩუენი, რომელი აწ მძვნვარედ იღელგების და დააცხრეთ ღელვანი იგი ვნებათანი და აღმური წუალებისა, რამეთუ თქუენ ხართ სიქადულ მისა, რადთა არა განუდგეს წმიდასა სამოციქულოსა ეკლესიასა მთავარნი და განმგენი ჩუენნი და იყუნეს მარადის ქრისტეს მადიდებელნი: ალილუია.

იკოსი 11

ჟ, კეთილმსახურებისა სიმკნითა დიდებულნო, რომელთა უძლურებაჲ დედობრივი განიოტეთ და ღუაწლსა მამაკაცებრ ახოვნად შეკადრნეთ, აწ დაშრიტეთ ერსა ჩუენსა ზედა აღძრულნი უკეთურთა ზრახვანი და დედანი და დანი ჩუენნი, ხატნი და ბეჭედნი მამულისა ყოფისანი, იკსენით ვნებათაგან ყოვლად წარმწყმედელთა და ურცხვინოებისაგან

დაიფარეთ, რადთა ქრისტეს სიყუარულითა და შიშითა,
ჩუეულებისაებრ მამულისა სღვისა, ვსენებასა თქუენსა
ადიდებდენ და დაუცხრომელად გნატრიდენ:

გიხაროდენ, ზეცისა იერუსალჴმისთჳს ტანჯვათა
დამთმენელნო;

გიხაროდენ, ხრწნილებისაგან ცოდვათასა

განმარინებელნო და ვნებათა ჩუენთა თავსმდებელნო;

გიხაროდენ, ქრისტეს სიყუარულისა კაცთა შორის
დამნერგველნო;

გიხაროდენ, წინააღმდგომთა ძალთა დამცემელნო;

გიხაროდენ, ბოროტისა უკრძალველობისაგან
დამკსნელნო;

გიხაროდენ, შჯლთა მორჩილებად მამა-დედათა და
მწყემსმთავართა განმწურთნელნო;

გიხაროდენ, ეშმაკისა კადნიერებისა დამამკობელნო და
საშინელთა მზაკუვარებათა მისთა განმაქარვებელნო;

გიხაროდენ, მოშურნეთა და ცილისმწამებელთა
დამამდაბლებელნო;

გიხაროდენ, ყოვლისა ქუეყნიერისა ზრუნვისა
დამტევებელნო;

გიხაროდენ, სულიერისა მღჳძარებისა ზარისა
დამარისხებელნო;

გიხაროდენ, ცოდვათა ჩუენთა წყლოულებისა
დამაცხრობელნო;

გიხაროდენ, სილაღითა აღტაცებულთა

დამაწყნარებელნო;
გიხაროდენ, ათნო ბევრნო მოწამენო, დიდებანო და
გზრგზნო ტფილის-ქალაქისანო!

კონდაკი 12

დიდ-არს ძლევაჲ ბრწყინვალჲ, რომელი აჩუენნეთ
ჯორცთა შინა მყოფთა, ვითარცა უჯორცოთა, რამეთუ
ქრისტჲსთჲს გსუროდათ სიკუდილი, რომლითა
მიხვედით უკუდავებად, და სიხარულითა ღუაწლისა
თქუენისაჲთა ეკლესიაჲ ქართველთაჲ შუენიერად
მეწამულ-ყავთ, ამისთჲსცა თაყუანის-გჰსცემთ და
უგალობთ ქრისტესა, მეუფესა და ღმერთსა ჩუენსა,
რომელმან მოსცა ესევითარნი მეოხნი და მფარველნი
დედისა თჲსისა წილ-ხუდომილსა ერსა ჩუენსა:
ალილუია.

იკოსი 12

მოწამეთა გზრგზნისა მოღებაჲ გსუროდათ, და სიმჴნისა
მადლისა ზეცით მომღებელთა არა ჰრიდეთ ფიცხელსა
მას სატანჯველსა და სიკუდილსა, ვითარცა
საშუებელსა კეთილსა, და წარკუეთითა თავთაჲთა,
ნეტარნო, დაამხუეთ მრავალ-ღონჲ იგი სივერაგჲ
მტერისაჲ, ამისთჲსცა განსაცდელთა და ჭირთა შინა
მყოფნი, მოვიღებთ შეწევნასა, თქუენ შორის მკჲდრისა

საღმრთოდესა მადლისასა და ძალისაებრ ჩუენისა
შეგასხამთ ქებასა:

გიხაროდენ, საკვრველნო და ჭემმარიტად ახოვანნო
მკედარნო ზეცათა მეუფისანო, რომელთა უღმრთოთა
რისხვაჲ სიმჴნით თავს-იდეთ და დიდებაჲ ქრისტესი
განაბრწყინეთ;

გიხაროდენ, გუნდო პატიოსანო, რამეთუ სიმრავლემან
გუამთა თქუენტამან და სისხლთა ყოვლად წმიდათა
თქუენტა, ერთად დიდ-მდინარედ გამოსრულმან
განაკვრვა ძალნი ზეცისანი;

გიხაროდენ, უხრწნელებითა შემოსილნო, რამეთუ
სხურებითა სისხლთა თქუენტათა დაშრიტეთ
ნაკვერცხალნი საცთურისანი;

გიხაროდენ, უძლეველითა ლუაწლითა ბრწყინვალენო,
რამეთუ სანატრელისა მის მოწამისა ჰაბო ტფილელისა
თანა მარადის თქუენ ხართ მცველნი და მფარველნი
ტფილის-ქალაქისანი;

გიხაროდენ, ცხოვართაებრ დაკლულნო, რამეთუ
მდინარენი სისხლთა თქუენტანი მორწყავენ
ქართველთა ეკლესიასა და წმიდა-ჰყოფენ სიმრავლესა
მართლმადიდებელთასა;

გიხაროდენ, რწმენისა და მამულისათჳს
დამაშურალნო, რომელთა სძლეთ ცრუ-
შჯულისდებისა მოძლუართა;

გიხაროდენ, მნათობნო დაუვალნო, რამეთუ

უბრწყინვალეს მზისა განბრწყინდით სასუფეველსა
შინა ზეციერისა მამისასა;

გიხაროდენ, მართლმადიდებლობისა სასანთლენო,
რამეთუ განაცისკროვნეთ ღამწ სპარსთა
საცთურებისად;

გიხაროდენ, უმკურვალესად ქრისტწსთვს
თავდადებულნო, რამეთუ მიიღეთ სასყიდელი იგი
მუშაკობისად;

გიხაროდენ, მართლმადიდებელთათვს ზეციით
მონიჭებულნო სიმტკიცენო, რამეთუ ზღუდელ
მოცემულ ხართ თქვენ ერისათვს ჩუენისა;

გიხაროდენ, ზეცისა ქალაქისა მოქალაქენო, რამეთუ
სიმკნენი თქვენნი განამკნევებს ქართველთა;

გიხაროდენ, ძლევანო და დიდებანო მამულისა
ჩუენისანო, რამეთუ კურნებათა მდინარედ და
სასწაულთა საუნჯედ აქუთ თქვენ ივერთა ერსა;

გიხაროდენ, ათნო ბევრნო მოწამენო, დიდებანო და
გვრგვნო ტფილის-ქალაქისანო!

კონდაკი 13

ჟ, ნათესავნო რჩეულნო, სამეუფონო და სამღდელონო,
ქრისტწსთვს სისხლისა დამთხეველნო, ვითარცა
ელვად მზისად და ბრწყინვალეზად მთოვარისა
განანათლებს სოფელსა, ეგრეთვე ვსენებად თქუენი,
ნეტარნო, ყოველთა მარტვლთმოყუარეთა ქართველთა,

რამეთუ მადლსა მას კურნებათასა მიანიჭებთ,
მოწამენო, და მცხინვარებითა საკვრველებათადათა
განანათლებთ ქრისტეს მიმართ მკურვალედ
მგალობელთა : ალილუია.

ეს კონდაკი ითქმის 3-გზის, შემდეგ

სავედრებელი ლოცვა

ჟ, არომატნო ნელსაცხებელნო უსასყიდლონო
სულნელებანო ქრისტესნო, მცველნო და მფარველნო
ქალაქისა ჩუენისანო, მეოხნო და შუამდგომელნო
ქართველთა ნათესავისანო, მვედრებელთა თქუენთა
მსწრაფლშემწენო და წყალობისა მომნიჭებელნო,
რიცხვით ათნო-ბევრნო მოწამენო!

ჟ, ვარსკულავნო მრავალ-ბევრნო განათლებულნო,
ნათლითა მზისა სიმართლისადათა
განმაბრწყინვებელნო ქუეყანისა თქუენისანო!
მოგკესენეთ წინაშე ღმრთისა და განსაცდელთაგან და
ჭირთაგან შეცული ერი ჩუენი იკსენით ოხითა
თქუენითა, რადთა წყალობისა წილ არა მოვილოთ
საშჯელი კადნიერებისაჲ, რამეთუ აღვრიენით ერთა
უცხოთა რჯულთა, განდგომილთა ქრისტესგან,
რომელთაგან ვისწავეთ საქმენი მათნი და ვკმონებთ
გულის თქუმასა გულთა ჩუენთასა მიბამკთა მათითა,
ვითარცა უსასოონი ქრისტესგან და დამვიწყებელნი

საუკუნოდსა ცხორებისანი. კუალად განგვიახლეთ თქუენებრ მჯურვალებად სარწმუნოებისად, სიყუარული კეთილმსახურისა მეფისად და ერთგულებად ღმრთისაგან ბოძებულისა მამულისად, რომელიცა განიპოხა სისხლითა თქუენითა, და დაშრიტეთ საზეპუროსა ერსა ჩუენსა ზედა აღძრული საიდუმლოდ იგი უმჯულოებისად, რომელ არს წმიდისა იგი შემბილწველი „საძაგელი მოოხრებისად“.

მრავალშემძლებელითა ძალითა თქუენითა დაიფარეთ მამული ჩუენი - საქართველო - ყოვლისაგან ჭირისა და თანამბრძოლ გუეყვენით ჩუენ მარადის წინააღმდეგომად მბრძოლისა, ჩუენ ზედა აღბორგებულისა და დაიცევით დედაქალაქი ჩუენი უცხო თესლთა ზედა მოსლვისაგან. განაძლიერეთ უწმიდესი და უნეტარესი, სრულიად საქართველოს კათოლიკოს-პატრიარქი, მცხეთა-თბილისის მთავარეპისკოპოსი და ბიჭვინთისა და ცხუმ-აფხაზეთის მიტროპოლიტი, მამად ჩვენი ილია, ყოვლადსამღდელონი მიტროპოლიტნი, მთავარეპისკოპოსნი და ეპისკოპოსნი და ყოველნი სამღდელონი და სამონოზნო წესნი, მჯედართმთავარნი და ქალაქმთავარნი, ქრისტესმოყუარე მჯედრობანი, და კეთილისმყოფე-ლნი ჩუენნი, და ყოველნი მართლმადიდებელნი ქრისტეანენი. ევედრენით, ყოვლადბრწყინვალენო მარტვლნო, თქუენგან

შეყუარებულსა ტკბილსა იესუს, რადთა შეგვინდოს განდგომილებანი, ეკლესიათა ნგრევანი, ღმრთისმსახურთა მკვლელობანი, ღალატი, შური, და უწყობანი, საშოსა შინა ჩვილთა ჩუენთა კვლანი და სხვანიცა შეცოდებათა ჩუენთა სიმრავლენი.

ჟ, კრებულო საღმრთოო, ერთითა წმიდითა განზრახვითა შეკრებულო ათბევრობაო მოწამეთაო! იმეოხეთ წინაშე ღმრთისა, რადთა მოჰმადლოს ეკლესიათა დიდებად, სამღდელოთა პატიოსნებად, მთავართა კეთილად მწყსად ერისად, მკედართა მამაცობად, ერისაგანთა უცოდველობად და დედათა კრძალულებად, ხოლო ჩუენ აღგვიდგინოს ღმრთისმოსაობად, სიმართლისმოყუარებად, მრავალშვილიანობად, და ქვრივ-ობოლთა შეწყალებად. მოგვანიჭოს სიწმიდით ცხოვრებისა სიყუარული, უჯეროთა საქმეთა სიძულვილი და გულისა შემუსრვილება, წმიდათა თანა გზრგზნოსნებად და ცათა სასუფეველისა დამკვდრებად, რადთა ჩუენცა თქუენ თანა ვადიდებდეთ მამასა და ძესა და წმიდასა სულსა, აწ და მარადის და უკუნითი უკუნისამდე, ღირს არს ჭემმარიტად რადთა ვადიდებდეთ შენ, ღმრთისმშობელო, რომელი მარადის სანატრელ იქმენ, ყოვლად უბიწოდ და დედად ღმრთისა ჩუენისა, უპატიოსნესსა ქერუბიმთასა და აღმატებით უზესთაესსა სერაფიმთასა, განუხრწნელად მშობელსა სიტყვსა ღმრთისასა, მხოლოსა ღმრთისმშობელსა გალობით ვადიდებდეთ.